



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA KUMI

Kikao cha Ishirini na Tano – Tarehe 12 Juni, 2018.

Kikao Kitaanza Saa 3.00 (Tatu) Asubuhi
na Dua itasomwa.

- I. **TAARIFA YA SPIKA:**

- II. **HATI ZA KUWASILISHA MEZANI:**

Waziri wa Fedha na Mipango:

Hotuba ya Makadirio ya Mapato na Matumizi ya Wizara ya Fedha na Mipango kwa Mwaka 2018/2019.

Mwenyekiti wa Kamati ya Fedha, Biashara na Kilimo:

Hotuba ya Maoni ya Kamati ya Fedha, Biashara na Kilimo Kuhusu Makadirio ya Mapato na Matumizi ya Wizara ya Fedha na Mipango kwa Mwaka 2018/2019.

III. MASWALI:

Ofisi ya Rais, Katiba, Sheria, Utumishi wa Umma na Utawala Bora:

152. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:

Kumekuwa na malalamiko kutoka kwa baadhi ya wazee ambao watoto wao wamekumbwa na matukio ya udhalilishaji kwamba baadhi ya hukumu zinatolewa mahakamani za faini na fidia, ambapo ile faini inakuwa kubwa na inakwenda Serikalini na fidia inakuwa ndogo anayopatiwa muathirika.

- (a) Je, kwa utaratibu huu wa hukumu, Serikali haioni vibaya kujipatia fedha za faini kubwa zinazotokana na kadhia ya mtu kubakwa au kudhalilishwa.
- (b) Kwanini faini isiwe ndogo na fidia ikawa kubwa ili mwathirika apate kugharamia matibabu au hali ya kuathirika kiakili na kimwili.
- (c) Vigezo gani vinatumika kuwahukumu wabakaji faini kubwa na fidia ndogo.

Wizara ya Fedha na Mipango:

102. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Fedha na Mipango:

Pamoja na kwamba kazi za matengenezo makubwa ya jumba la treni (Chawl Building) zinaendelea vizuri, lakini mkataba huo ulipaswa kumalizika mwezi wa Mei, 2018. Kwa kuwa katika kipindi hiki cha ujenzi, lipo tatizo la msongomano wa wafanyabiashara wanaohitaji jengo hilo.

- (a) Je, Kampuni iliyopewa kazi ya matengenezo hayo itakamilisha na kukabidhi jengo hilo mwezi gani.
- (b) Je, hadi sasa Kampuni hiyo imeshafikisha asilimia ngapi ya ujenzi wa jengo hilo na guarantee yake ni ya muda gani.

- (c) Je, hadi sasa Kampuni hiyo imeshalipwa kiasi gani cha fedha na kiasi gani ambacho kitabakishwa kwa wakati wa uangalizi ili kuhakikisha kwamba jengo hilo linakidhi viwango ambavyo vinakubalika kwa majengo kama hayo.

Wizara ya Ardhi, Nyumba, Maji na Nishati:

93. MHESHIMIWA BAHATI KHAMIS KOMBO (Jimbo la Chambani) - Atamuuliza Mheshimiwa Waziri wa Ardhi, Nyumba, Maji na Nishati:

Kwa kuwa Serikali ya Mapinduzi ya Zanzibar inafanya jitihada kubwa ili wananchi waondokane na tatizo la maji siku hadi siku na bado tatizo hili lipo Unguja na Pemba.

- (a) Je, Serikali imejipanga vipi kuweka miundombinu mbadala ya uchimbaji wa visima ili kuondoa tatizo hilo.
- (b) Je, Serikali haifahamu kuwa kuchimba visima vikubwa tunapata hasara kubwa.

Wizara ya Habari, Utalii na Mambo ya Kale:

170. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Habari, Utalii na Mambo ya Kale:

Kwa kuwa baadhi ya kampuni za utalii “tour operator” zimesajiliwa na kupewa leseni lakini kuna baadhi ya Kampuni hizo zinakiuka taratibu kwa kudanganya wakati wa usajili wake jambo ambalo ni kwenda kinyume kwa mujibu wa sheria na kanuni za utalii.

- (a) Je, Kamisheni ya Utalii imefanya utafiti gani kuzibaini kampuni hizo na kuzichukulia hatua stahiki kwa mujibu wa sheria.
- (b) Je, pamoja na Kampuni za kigeni, kuna kampuni ngapi za wazawa ambazo nazo zimebainika kufanya udanganyifu kwa umiliki wa kampuni sambamba na vibali vya kufanyia kazi.

Wizara ya Biashara na Viwanda:

63. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Biashara na Viwanda.

Mnamo tarehe 5/3/2018 vyombo vya habari nchini vimeripoti mpango wa Serikali kufufua upya kiwanda cha nguo cha Cotex.

- (a) Je, mpango huo ni kweli.
- (b) Kwanini kiwanda kile kilikufa na mikakati gani inafanyika ya kufufua kiwanda hicho ili kudhibiti changamoto zilizosababisha kiwanda hicho kufa.

Wizara ya Ujenzi, Mawasiliano na Usafirishaji:

236. MHESHIMIWA MACHANO OTHMAN SAID (Jimbo la Mfenesini) - Atamuuliza Mheshimiwa Waziri wa Ujenzi, Mawasiliano na Usafirishaji:

Katika kipindi kisichopungua miezi nane (8) iliyopita, Serikali ya Mapinduzi ya Zanzibar ilitiliana saina na Kampuni ya ujenzi kutoka China juu ya ujenzi wa barabara ya Bububu, Mkokotoni, hatua ambayo imefurahiwa sana na wananchi wapenda maendeleo. Hata hivyo, wananchi hao wameanza kuingiwa na hofu juu ya muda wa kuanza kwa ujenzi huo,

- (a) Wananchi wapenda maendeleo wanataka kujua ujenzi huo unatarajiwa kuanza lini na utanzia sehemu gani.
- (b) Ni hatua gani zilizochukuliwa kuhakikisha kwamba nafasi za ajira za kazi za ujenzi wa barabara hiyo zinapewa kipaumbele kwa wananchi wa maeneo husika.

Wizara ya Afya:

7. MHESHIMIWA SHEHE HAMAD MATTAR (Jimbo la Mgogoni) – Atamuuliza Mheshimiwa Waziri wa Afya.

Kwa kuwa katika nchi yetu kuna wakunga wa jadi au wa asili wengi huko mitaani ambapo Serikali inawatambua kwa kuwapa vibali, pamoja na kuwepo kwa nyumba au vituo

binafsi vinavyotambulika kusaidia uzalishaji wa watoto hapa Zanzibar.

Je, Wizara yako iko tayari kuwatafuta na kukaa pamoja na wakunga wa jadi au wa asili kwa lengo la kuwashauri na kufungua vituo hivyo rasmi ili kuendelea kuzalisha kwa usalama wa mama na mtoto.

136. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Afya:

Siku za hivi karibuni kumekuwa na harakati za kuwahamisha wagojwa katika jengo la Hospitali ya Wete.

Je, kuna kitu gani kinafanyika mpaka wagonjwa wanahamishwa.

IV. HOJA ZA SERIKALI:

Waziri wa Ardhi, Nyumba, Maji na Nishati:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Wizara ya Ardhi, Nyumba, Maji na Nishati kwa mwaka 2018/2019.

Waziri wa Fedha na Mipango:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Wizara ya Fedha na Mipango kwa mwaka 2018/2019.

Zanzibar,
12 Juni, 2018.

(Raya Issa Msellem)
KATIBU WA BARAZA.